

平定粵匪紀略

平定粵匪紀略卷十二

咸豐十一年七月江西克復新昌奉新經瑞州府

偽忠王李秀成自本年三月竄踞瑞州府分陷上高
新昌奉新等縣以瑞州爲老巢前皖南道李元度於
六月十四日既克復武甯等縣官大臣由楚籌給餉
需飭令乘勝前行七月初二日進駐新昌交界之棗
橋分屯奉新交界之茅竹山爲合取瑞州計初四日
馬隊抵天寶距新昌城七十里賊沿鄉肆掠不虞官
軍驟至螺陂嶺團練亦來助戰賊匪敗退追至曹家

嶺初七日合兵薄城下都司楊在田從西門包抄殺賊三百餘名斬關直入克復新昌其駐茅竹山之軍由九仙湯羅坊一路追賊前進初八日克復奉新縣是日復分兵收復上高縣敗賊均趨瑞州遂遣游擊賀接華都司吳得意等據瑞州初九日抵塘溪賊列隊城外馬步布滿山岡我軍正慮衆寡不敵營官朱得樹以五營由新昌振旅至殺賊四五百名都司易咸臨羅寅等首先登城郡城立復後李元度因所報克復各城有虛飾處獲咎議遣戍

楚軍克復德安府

陳逆玉成率衆退援安慶於孝感德安各留悍賊以牽制我兵而圖窺荆襄蓄謀甚毒官大臣等派撥水陸各軍節次嚴勦既克復孝感縣卽添派隊伍飭令副都統舒保卽用道金國琛副將張啓基等進勦迅籌攻克金國琛等於陸路增設礮臺水師沿河排擊賊衆尙堅忍死守各弁勇分挖地道轟城屢坍而賊仍搶堵乃築四面長圍以困之七月十一日派定隊伍激厲士卒圍大舉部署甫定城賊五六千冒死突

出爲諸軍擊潰不得入復出賊五六千圍抄我軍後以援前賊楊富有關門斷絕歸路敗賊奔河西伏兵四合架雲梯一鼓緣登斬守陣悍賊數十開門納師斃城內外老賊三千四百餘名克復府城分兵窮追沿途斬馘橫尸徧野餘匪無幾竄往河南

楚軍擊退援賊力解太湖之圍桐城安慶圍師連捷

陳逆玉成安慶敗竄後糾僞輔王楊輔清圍集匪黨號稱十餘萬自無爲州竄英山繞宿松徑撲太湖爲救援安慶計官大臣胡巡撫飛檄諸營慎密戒備總

兵胡裕發沈浚德副將巢日升候補道歐陽正藩會
同署安慶府知府孫振銓等守太湖登陣捍禦七月
初一日賊排隊山岡作長蛇勢復有賊數萬自龍山
宮對岸至塔下表延二十餘里分途誘敵我軍穩守
不爲動賊不敢逼夜大雨衆賊洶湧潮進城中飛槍
礮隨雨落賊受創多斃次晨始退殺賊千餘名奪馬
匹輜重無算太湖之圍頓解賊由太湖之黃泥港小
池驛竄至清河三橋頭高樓嶺欲結桐城之衆包裹
官營以解安慶圍副都統多隆阿派隊赴馬鞍山堵

勦而僞璋王林逆等自桐城至挂車河蔣家山列陣以待參將譚仁芳副將右清吉等分途迎敵賊衆悉披靡追抵城根城賊出撲多隆阿親督兵勇堵截三門復派員率八營疾趨蔣家山拔木城二燈堅壘五座焚棚帳二百餘處賊向東路逃竄陳玉成楊輔清二逆已率大隊竄至高河舖馬鞍山多隆阿添派馬步分擊令雷正綰王可陞繞攻賊後賊又敗遁桐城之圍復合安慶圍師經曾國荃會楊提督分道攻城城外各壘剽平略盡竝燬其東門外月城惟北門外

三石壘最固十一日營官程學啓督弁勇從蔽躍
入生擒壘中賊三百七十餘名越日復入乘機猛攻
石壘皆破又擒老賊八百三十七名獲僞將軍僞侯
及丞相先鋒指揮檢點等數十名北門之路已爲官
兵扼絕

楚軍攻黃州獲勝並勦蕪水野掠賊

逆踞黃郡築堅壘城外環浚深濠總兵李續燾游擊
王允昌會營總花凌阿等率馬步擇要紮營扼賊上
竄時南岸肅清官大臣調派記名總兵成大吉候選

道蔣凝學知府毛有銘率所部十八營由南岸渡江
先勦黃岡蘄水掠野之賊以孤其勢七月十八日李
續燾等馬步進紮迴龍山攻七家嶺賊衆三路獲勝
斃賊三百餘名生擒四十名十九日水師副將成發
翔督參將丁長春等會合陸軍敗賊於玉帶橋焚卡
壘數座殪其悍目敗匪悉潰竄入城成大吉等軍亦
獲勝蘄水縣無城郭匪黨竄伏鄉邨割禾稻以充饗
先經蘄水縣知縣蔣照督練勇截擊屢有擒斬副將
何紹彩補用知府唐協和奉檄由興國馳赴與成大

吉合軍至薪水二十四日偵縣屬李店等處有賊蹤
派游擊唐啓虞參將唐敏興都司何文喜密約蔣照
等出奇夾擊蔣照自蔣家山後進唐協和統率各營
自山前進賊腹背受創紛紛潰散卡壘悉平
曾營各軍獲捷於江西樟樹鎮

偽忠逆李秀成等自瑞州竄出由臨江渡河盤踞樟
樹鎮豐城等處綿亘百餘里曾大臣派提督鮑超督
諸軍進勦七月十九日赴豐城二十四日逆黨於樟
樹鎮搭浮橋過河至西北岸列陣山岡與官軍抗拒

鮑提督飭總兵陳由立自中路進總兵黃慶攻賊之左副將易昌煥攻賊之右總兵宋國永勒兵山後鼓譟迎戰鮑提督傳令四路竝進迅猛躡賊不能當紛紛潰退追殺五十餘里橫尸徧野斬首八千餘級八月楚軍克復安慶城

時省垣已淪陷九年矣楚軍自攻克九江後節節掃蕩於上年進兵水陸合圍城內之賊不下三四萬卽用道曾國荃統領全師銳意圖之陳逆王成糾南北路悍賊疊次上竄冀解城圍副都統多隆阿力遏兇

鋒援賊皆受創而退楊提督小師往來攻擊絕其糧道曾國荃復築長濠晝夜穩守逆之圖竄牽掣各計皆無由逞及德安克復逆計更絀而安慶諸圍軍益得專心致力七月十一日攻破北門石壘二座援逆敗走旋復圍集陸續入關焚燒民舍在關口毛嶺十里舖一帶築壘四十餘座散布山岡晝則旌旂林立夜則火光燭天城賊亦列隊四門相接應二十日援賊撲後濠分十餘路疾趨而進我軍俟逼近濠邊以槍礮轟擊斃賊無數二十二日悍賊入中路第二層

濠修月墻于第一層濠外以避礮子曾國荃縱壯士數十人出濠外蹋燬之並親率各勇增修新壘置礮伏精兵於濠之左右以防衝突賊衆傾巢出由鹽河至十里鋪以東直撲新壘我軍奮力夾擊僵尸徧田壠陳楊二逆首援桴鼓督陣揮刀砍不前者衆賊猛撲十餘次而新壘已成自夜達旦殲銳賊三千餘賊鋒大挫乃收隊自二十三日至二十八日賊輪班遞攻曾國荃督各營官亦輪營應之羣逆既屢戰皆挫又於菱湖北岸築壘十餘座昇小艇泛湖汊齎糧入

城水師副將蔡國祥駛礮船阻截奪獲是夜城賊運礮赴賊壘亦爲我軍奪得賊計窮無所施三十日我軍地雷已成八月初一日卯刻發火轟坍西北門城垣曾國荃整隊而進分班勦殺臨水一面之賊多出南門投江死其西東北三門之賊皆爲我兵勇截殺從百花亭跳城逸出者水師盡殲之踞城逆城死亂軍中共斃賊一萬六千有奇四僞王在城外者喪膽竄出集賢關

進克池州府

會大臣先與楊提督約如安慶克復卽進圖沿江各府縣池州爲要衝八月初二日楊提督派總兵王明山黃翼升率水陸各營攻池州府王明山飭副將趙三元先發而自統水營繼之黃翼升率水師由安慶北岸載周萬倬陸師東下初五日趙三元先至繞城攻擊萬礮雷轟賊不能支又聞諸路軍齊進開西北門遁去王明山黃翼升駛至會同追勦斃賊極多立復郡城

續克桐城宿松黃梅蘄州廣濟各州縣

桐城爲七省要道安慶咽喉城堅而高形勢險阻逆黨志在必踞故死守待援我軍旣克安慶曾道國荃與副都統多隆阿會議以陳逆玉成尙擁衆數萬徘徊於集賢關外不早圖翦滅必與桐城合併勢將復振遂於八月初二日派營官曾貞幹朱洪章等從東路石塘湖相機進勦殪悍賊十餘逆衆敗潰且斬且追關內外壘館悉平計殺賊二千有奇多都統遣記名副都統穆圖善迅往桐城而自率吉林黑龍江各馬隊由間道抄出三橋頭初三日遮擊陳玉成楊輔

清各隊皆大敗越山而逃穆圖善之馳勦桐城也分遣副將譚仁芳朱希廣等率六營由挂車河大路抵北門總兵雷正綰楊朝林等率六營由棋盤嶺抵南門總兵石清吉副將劉寶國等率六營由官板橋抵西門剋期至桐城齊集穆圖善親率馬隊百餘隨後至用草填濠而過架雲梯奮呼登城賊衆出東門逃避戮其不及出城者一千餘賊克復桐城派副將石清吉統勁兵畱守而自引諸軍回挂車河老營初四日陳逆等由三橋頭竄至石牌之蠟樹窠多都統派

記名副都統溫德勒克西協領舒亮督三營總率領
吉林黑龍江馬隊西丹並飭儘先協領蘇倫保格通
阿隨同督隊分三路馳抵蠟樹寨四面抄擊逆眾宵
遁馬隊連夜追出太湖殺賊一千餘敗黨竄宿松之
桃花舖溫德勒克西等督馬隊三路取勝一抄其前
一躡其後一橫截突擊復斃賊二千餘名餘匪入宿
松城馬隊合追抵宿松薄其城初八日賊衆出西門
竄往黃梅追殺十五里遂復宿松縣多都統旣遣馬
隊度賊敗後必與黃梅踞逆合股派雷正綰率步隊

往黃梅邀截宿松敗賊未及入黃梅城賊隊已至馬
隊復追抵東門賊繞城敗潰城賊亦開大西門出竄
知縣覃瀚元率團勇隨隊入城計馬步沿途追殺約
三千餘名蘄州知州李瑜亦督練會同水師副將喻
俊明等水陸攻城與黃梅城同日克復其廣濟縣踞
逆聞官軍克復桐城所至瓦解亦膽落先逃十一日
多都統派隊收復並追斬多名

楚軍克復黃州府

黃郡踞逆負隅固守於城外浚濠築壘以抗官軍官

大臣胡巡撫調總兵李續燾卽補道蔣凝學等督八營兵勇會廣東按察使彭玉麟水師進勦竝飭總兵成大吉率馬步隊駐紮上巴河助戰是時宿黃廣蘄旣克復多都統帶全隊紮蘄州曹家河扼堵下游敗匪以絕其援蔣凝學令投誠賊目劉維楨仍用賊衣黃旂偽爲援衆趨三台河對岸徧燒野火與水陸各軍虛放槍礮造陳玉成僞文誘城賊出隊接應我軍設伏待之城賊墮計於八月二十四日率衆出城欲圖襲營我軍伺其離城已遠驟發號礮伏兵四起焚

燒賊館火光燭天馬步縱橫衝擊積尸如山敗黨竄入玉帶橋三台河又爲水師攔殺賊多自沈死河水爲之不流大軍遂乘勝搶城斃賊極多生擒二十餘名有鬼水脫逃者劉維楨花凌阿等跟蹤追勦擒斬四千有奇有由小路入山者多都統馬隊搜勦亦斃二千餘名漏網無幾

會營鮑軍敗逆衆於湖坊河口克復鉛山縣

忠逆李秀成竄出豐城卽踞白馬寨另股圍攻撫州鮑提督超聞警馳援城圍立解尋奉檄勦安慶援賊

至則安慶省城已克復乃星夜折回八月十四日再抵撫州偵賊已竄湖坊是月二十二日督隊前進賊已整隊於河口迎敵勢甚洶湧我軍分五路會攻鏖戰三時賊大敗蹋平七十餘壘乘勝追殺至鉛山城外賊壘七座一鼓平之火箭入城延燒藥桶突烟燄進擊賊開東門遁克復鉛山縣

楚軍克復銅陵縣

水師總兵王明山等既克池州率所部水師之船分載陸軍下勦先派內江親兵於八月十一日赴銅陵

決東北門外隄堰水師從決口駛入王明山攻東門
黃翼升會陸師攻西門相繼登城殺賊千餘卽於是
日申刻克復

浙江嚴州府餘杭縣城先後失守

侍逆李侍賢率衆攻圍嚴州幾兩月竝於烏石方門
二灘連環築壘逼近外濠已革提督張玉良選銳衝
鋒皆爲賊阻腹背受敵不能前進賊自南門攻入經
副將羅大春殺退守至八月十七日糧盡援絕羅大
春身受重傷率領將士突北門而出府城遂陷另股

賊匪由幽嶺關薄餘杭城署知縣吳淦督團勇固守
以衆寡不敵迎戰失利同日亦陷

湖北胡巡撫薨

胡巡撫賞罰嚴明知人善任克復武昌後與官大臣
曾大臣合德同心會議東征所向克捷在楚整飭吏
治籌備饟需農不病而課充法不苛而吏肅釐剔漕
弊紀理屢規尤爲善政三月內在太湖營中因積勞
咯血力疾治軍務不少輟八月朔克復安慶以首謀
功

加太子太保聞

文宗顯皇帝龍馭止賓拊膺大慟瘳益不可爲二十六日薨

事聞蒙

恩追贈總督

賜祭葬如例

加恩予謚入祀賢良祠併於湖北省及湖南原籍建立專祠嗣曾大臣以故撫忠節盡瘁勲績最多上陳

詔宣付史館

九月浙江逆分黨連陷蕭山諸暨縣紹興府城亦失守

逆陷嚴州府句通八槩礮船由臨浦攻陷蕭山及諸
暨等縣復率領羣匪分道犯紹興府時在籍副都御
史王履謙督辦團練會同守城文武堵禦九月二十
九日賊衆架竹梯登城入西郭門戕捍陣兵勇數十
人奪開城門羣賊一擁而入府城遂陷

曾營各軍克復無爲州

時廬江舒城皆收復惟無爲居皖北形勝控金陵引
蕪湖爲賊必爭之路故於附近泥汊口神塘河等處
築石壘以阻我師曾大臣派知府陳提帶兵勇五千

人由廬江規取而令補用道劉連捷統三千人守廬江九月初二日記名按察使曾國荃督副將蕭孚泗彭萬全等坐陸師以礮船同水師總兵王明山黃翼升順流東下十五日抵泥汊口見賊壘居高難仰攻令修壘安營槍礮聲徹夜不絕而自率勁旅迅赴楊家橋鳳凰頸決隄埽斷賊歸路賊果大懼於十六日夜遁入無爲州城十八日進攻神塘河賊壘賊亦遁歸乃乘勝直抵城下先是曾臬司克安慶時無爲州賊目馬玉棠之妻子居安慶曾臬司生致之不殺密

諭王棠獻城降既有成議而其機於十九日先洩馬
玉棠爲逆首僞頂王朱逆幽閉馬玉棠之黨舉兵攻
朱逆我軍因之逆衆大潰由北門出竄水陸軍圍勦
斬悍賊二千餘名王明山分隊入城復殺賊五六百
斃僞豫侯丞相等州城立復

楚軍攻拔運漕鎮及東關

無爲含山界有運漕鎮者外瀕大江內通巢湖賊糧
皆屯於此上濟安慶廬州下輸金陵爲南北鎖鑰僞
巨王洪逆率賊五六千人並礮船數十號以守之與

東關相援應九月二十三日記名按察使曾國荃遣
總兵王明山撥水師三營泊黃維河遏巢湖出路而
自率親兵與總兵黃翼升水師進取運漕鎮逆衆以
礮船迎敵我水師飛礮而前奪賊船十餘焚者倍之
賊衆覓水遁去岸賊亦不戰自退各營躍登追逐殺
賊約三千名二十九日黃翼升與知府陳湜領水陸
各軍徑攻東關槍礮甫施賊已驚潰不敢歸壘遂併
力抄擊奪石壘守之

浙逆陷處州府

浙江松陽逆自縣城克復後竄逼處州九月十七日
由碧湖水陸竝進直撲郡城處州鎮總兵特保等督
隊迎勦開礮擊沈賊船二斃賊目數名後隊大衆擁
擁而至官軍太單不能禦城遂陷特保退守石帆收
集潰卒整隊伍修礮船十八日分攻各門水陸夾擊
斃賊甚多擒髮逆五名賊踞城固守二十日乘竹簾
撲我厦河營我軍俟半渡轟之賊大敗落水死者無
數城南等處擄糧賊亦爲官軍所敗慶總督端復派
游擊黃載清馳往助之

十月楚軍克復隨州

湖北自黃州德安攻克後髮逆盡殲惟隨州尙有遺孽以毗連豫境捻黨擾及襄陽因之以爲援應憑堅死守屢抗我軍前派副都統舒保率馬步紮城外會同卽補道劉嶽昭環攻賊屢受創擒斬多名而層濠疊壘未能卽拔官大臣旣派員弁勦退豫捻乃調己保都司之投誠義勇劉維楨赴隨投以機宜令用前取黃州舊計劉維楨遂於九月二十九日馳抵隨州假用英逆陳玉成僞文誘令出城交劉嶽昭派親信

勇丁陳勝清於三十日傳遞入城是夜未返劉嶽昭
度已中計乃分撥隊伍四路設伏十月初一日逆眾
果由西南兩門齊出遂由東北殺入初一日戌刻克
復州城竄出之賊合力痛勦前後擊斃萬餘名生擒
一千五百餘名逆首馬清太斃於亂軍中

兩江總督曾大臣兼轄浙江全省軍務

時浙江逆勢猖獗全省糜爛逆氛進逼省垣故有是
命自巡撫提鎮以下均受節制

上海官紳遣使如皖營乞師

上海自蘇城不守避難者四集賊氛日惡薛巡撫煥
龐大臣鍾璐招集潰兵添募壯勇署布政使吳煦勸
諭互市英法各國會剿雖有斬擒終不能支適湖北
鹽法道顧文彬自楚歸以會大臣軍已克安慶擬將
遵江東略軍威甚盛因倡乞援之議並議立會防局
預備輪船濟師吳署布政使願任餉事薛巡撫龐大
臣從之遂遣戶部主事錢鼎銘候補知縣厲學潮候
選訓導張瑛如皖乞師會

上厪念東南博求將帥曾大臣疏舉福建延邵建遺缺道

李鴻章率師進援

十一月逆攻陷杭州將軍瑞昌巡撫王有齡等死之

各省攻勦劇嚴重城疊克金陵唾手可得首逆洪秀
全懼甚乃令僞忠王李秀成僞侍王李侍賢分途竄
擾以分我兵力李秀成竄浙江疊陷各郡邑直至餘
杭縣杭州省垣戒嚴九月二十四日陷蕭山縣二十
五日從塘路直抵杭州撲武林門外賣魚橋踞我營
卡二十六七等日布政使林福祥饒提督廷選先後
引軍還省賊隊大至運糧道阻十月初五日張提督

王良由上游來援列營城外王巡撫有齡在城百計
嚴防賊技無所施乃自海潮寺至鳳凰山環以木柵
實土其中爲堅壁使城外官兵隔絕競以槍礮轟城
十九日張提督督隊攻木柵中礮陣亡內外兵勇愈
怯城久乏糧人多餓死蕭山陷後諸暨繼失復被乘
虛竄陷紹興另股由奉化攻撲甬波郡城亦失致杭
州援兵路絕堅守兩月餘至十一月二十七日失陷
王巡撫自經於署越四日駐防滿城亦陷瑞將軍殉
難先後死節者學政張鋤庚浙江提督饒廷選處州

鎮總兵文瑞浙江鹽運使莊煥文署福建漳州鎮總兵副將繼興等

楊州軍敗逆於丹徒鎮進攻天長

蘇常逆圖撲鎮江時都將軍方會勦皖北擒匪恐鎮江有警飭令總統水師總兵黃彬等率師船沿途迎敵行抵丹徒鎮遇賊開礮轟擊賊亦鋌險抗拒鏖戰逾時賊衆始潰遂蹋平其壘殲斃無數追奔數十里尸橫遍野守備劉連升進攻圖山關爭先砍殺賊奪路狂奔燬沿邊賊卡數處而天長踞城逆猶抗踞北

岸爲敗匪聲援都將軍親督兵勇乘勝抵天長城城外賊壘甚多守禦亦嚴適見大軍至出壘迎拒副將劉成元等陷陣力擊敗之平毀賊壘斬擒略盡逆被圍迫密遣使投誠冀暫抒急困都將軍知其詐不許十二月逆圍徽州府大軍獲捷解圍

逆初圍杭州懼官軍進援乃爲先發制人計於十一月十四日分黨由潛安開化竄入皖南境二十二日至徽州屬之街口二十六日抵深渡僞輔王楊輔清率甯國大股圍攻徽州休甯兩城二十七日僞成天

安桂逆竄休甯之屯溪總兵唐義訓擊退之二十八日又竄篁墩十二月初二日進圍徽州府總兵張運桂督湘營兵勇堅守待援乘間出擊破賊壘多座殲斃甚衆逆復竄踞屯溪巖市街潛口一帶以絕徽軍糧道自初八日至二十六日文報均阻曾大臣調總兵朱品隆出嶺之師入援初八日進嶺十三日馳赴休甯與唐義訓商援徽之策十七日兩軍齊赴屯溪先破街口賊卡旋攻毀河邊四壘十九日將石橋潛口賊巢埽蕩二十二日派三營護糧赴徽賊由萬安

街分股包抄我軍奮勇力擊賊不敢退張運桂以巖市街爲賊踞糧道終不通密檄總兵黃萬友出隊間道馳赴休甯會商兜勦巖市二十六日諸軍合攻燬賊壘十餘座楊輔清受傷暫退值大雪平地深數尺馬步難行故不能窮追逆黨亦因擄掠無所得於除夕全股遁去城圍頓解

皖軍克復六合天長二縣

江南李提督世忠隸袁大臣臨淮軍勇銳激發力圖肅清江北知六合天長有隙可乘於十二月二十一

日督兵勇克復六合縣乘勝直擣天長二十五日薄城下誘開城門記名總兵王茂元李昭宸等奮勇衝入李提督督隊繼進投誠之陳士成率衆內應將踞城逆首龔長春等擒斬殆盡降衆數千三日內克復兩城奉

旨優獎

上海官紳議結夷兵勦賊

浦東廳縣復陷上海縣知縣劉郁膏率師往援失利官紳集議請立會防局在籍刑部郎中潘曾瑋航海

入都謁

議政王軍機大臣議准與夷兵會勦

平定粵匪紀略卷十三

同治元年壬戌正月江北克復江浦浦口

李提督世忠攻克天長後乘勢進攻江浦浦口約守
壘之賊劉元成單玉功等爲內應正月初四日揮隊
直前賊衆驚潰劉元成等率衆倒戈殺斃僞報王秦
逆僞王宗操天福等七十餘名餘匪搜殺殆盡立復
江浦縣城次日至浦口城下九洲洲援賊箇至李提
督激勵將弁痛殲之復得其城餘匪竄江邊追殺落
水者無算

浙軍解衢州圍克復常山平陽二縣

逆酋李秀成自陷常山與龍游踞匪同撲衢州府城
慶總督端飭總兵李定泰援勦屢有斬獲逆以大隊
衝撲官軍內外夾擊將賊壘悉數蹋平賊退銅錢嶺
又破之遂克常山城賊向東北竄去是月平陽縣踞
逆亦爲總兵秦如虎勦逐收復縣城

逆匪窺伺上海英法各外國助勦

逆竄奉賢後直撲吳淞口進擾上海縣之東西擺渡
適法國輪船在彼開礮相助斃賊無算賊退分踞天

馬山陳坊橋參將李恒嵩破其壘敗匪退入青浦城
中其浦東大股踞高橋欲斷我要隘美國人華爾約
同英國水師提督何伯法國水師提督卜羅德各帶
中外槍礮隊伍礮船排列海濱華爾與美國人白齊
文撲進賊巢立將賊壘掃蕩各外國自天津就撫紛
集上海貿易極散和好立會防局後薛巡撫等撫綏
駕馭諭以同仇至是竟得協助之力華爾白齊文感
慕華風願更服色爲中國臣民薛巡撫以聞得

旨嘉獎並賞給四品頂戴花翎以示鼓勵薛巡撫卽飭於

松江教兵勇習洋槍協同勦賊稱洋槍隊爲常勝軍
浙軍由徽入浙疊獲大勝開化肅清

逆酋僞輔王楊輔清糾合大股分路竄擾蔓延浙江
開化之張邨等處窺伺衢州左京卿宗棠率練兵由
徽州之婺源入浙連破賊巢陣斬大小賊目六十餘
名生擒二百五十餘名斃賊二千餘名獲僞印五十
餘顆是月十八日復大破賊於馬金陣斬逆首藍以
道計斃長髮悍賊五千餘名生擒二百餘名奪獲大
小僞印九十餘顆開化一律肅清

二月上海軍勦除蕭塘賊壘

自攻破高橋後進搆蕭塘賊壘二月初一日華爾與副領隊白齊文率常勝軍猛撲各受重傷仍不少卻破壘五座官軍亦分路兜勦斬擒極多

楚軍進勦安徽廬州毀賊壘卡

副都統多隆阿率楚軍由舒城進勦廬郡漸次逼城逆乘我築營未堅出賊六七千人分股來撲我以馬隊包抄之分路直前斃賊五六百名二月初一日總兵雷正綰率隊渡河焚其礮船及買賣街初二初四

等日復飭雷正綰與記名總兵石清吉等攻破其賊
卡四處木城四道西門得勝門賊壘四座連日斃賊
三千餘名

安徽潁州解圍

逆匪糾合捻股圍困潁州挖掘重濠密排鹿角以阻
官軍進攻之路布政使賈臻被困力保危城正月初
賊用地雷轟闕東北關營牆率衆上撲游擊范文英
李安邦等裹創力堵適起狂風煙燄回撲賊陣我軍
將關口堵合時勝大臣由太和縣督兵馳援初三日

砍砦衝入賊壘斃賊千餘名賈布政在城巡瞭見勝
軍得手亦整隊出城夾擊破北面賊巢十三座賊往
東竄我軍乘勢埽蕩蹋毀東西南三面賊壘三十七
座城圍立解

皖軍克復店埠要隘

店埠在廬州東北三十里爲定遠赴廬要隘前和提
督福巡撫攻勦時屯重兵於此逆築石城極堅皖軍
亟攻之逆首僞英王陳玉成由廬城添派賊酋卜姓
協守總兵張得勝乘夜前往直抵石城一擁而入立

將卜賊砍倒賊衆驚潰追殺十餘里遂克店埠

三月福建延邵建遺缺道李鴻章統領湘淮諸軍東下
先是曾中堂議以曾布政使國荃由陸路先攻和州
巢含各州縣李道統領諸軍乘勝東下曾馮提督子
材軍由鎮江進勦而上海賊氛日逼勢甚危吳署布
政使籌借餉銀二十餘萬兩由會防局僱備輪船仍
遣厲學潮錢鼎銘先後赴安慶迎師中堂遂令李道
率程學啓等軍十一營於三月初七日乘輪船東下
初十日抵上海營城南淮揚鎮黃翼升統領水軍相

繼來會

三月揚州軍勦退渡江逆衆

逆匪由金陵下擾糾合蘇州之衆計十餘萬人渡江
撲揚州都將軍興阿知賊衆且銳嚴約各營勿輕出
戰俟賊至近登壁擊之賊傷亡甚多退而赴鄉掠食
三月十三日我軍至徐家集等處誘賊出卡殺斃四
百餘名十六日賊由法海寺起至虹橋七里甸等處
排列長陣都將軍督隊出擊直趨虹橋翼長徐州鎮
總兵詹啓綸副將左起龍由三汊河率隊抄擊各斃

賊四五百名十七日逆等選洋槍隊衝至西門外列
於河西此隊爲張提督玉良舊部在蘇州從逆者極
跳浪廣西平樂協副將刁經明等鬼水往攻賊以大
隊壓下我軍驟退儘先都司廖長明率驍騎勇五百
人奮勇衝遏十餘回合賊始漸退各軍轉身再戰大
敗之追殺十餘里始歸後數日復派隊分路攻擊賊
退往儀徵

皖軍奪取駐馬邨要隘

金陵逆渡江爲李提督世忠擊走竄踞安徽和州之

駐馬邨依險築壘以通由南竄北之路李提督飭總兵王茂元等由林浦等處分道進攻衝爲兩截賊棄壘狂奔我兵沿江趕殺所有賊壘一律蹋毀立將駐馬邨要隘奪回

鮑軍克復青陽縣

曾大臣派浙江提督鮑超於上年十二月進攻青陽疊破投賊本年二月十五日飭副將劉順隆等先平西北門山背賊壘濬治長濠爲四面合圍計城賊勢蹙潛糾浙江死黨三萬餘衆進撲銅陵冀分我軍之

勢以解青陽之圍三月初六日鮑提督由青陽分軍
親率赴援初七日遇賊於橫塘飭三路進攻又令左
右抄擊賊恃衆悍迎拒兩時副將王衍慶等大呼陷
陣副將顏紹榮等潛取小徑繞襲賊後知府伍華瀚
等分領馬步四出盪決遂將橫塘等處百餘卡二十
六壘一律剷除先是僞奉王古隆賢偵知鮑提督分
兵而北陰統涇太悍賊在青陽南門外豬婆店增築
九壘將欲阻我之師以通糧路適鮑提督已振旅而
還遂於十五日督飭將士拔開鹿角躍過濠溝不逾

時而九壘悉毀自是軍心愈壯賊膽愈寒鮑提督知
青陽利在速攻乃於十六日秣馬蓐食銜枚疾進諸
將弁裹創血戰志在必得劉順隆等攀堞先登衆軍
乘之登時將縣城克復

會營水陸各軍擊敗竄匪舊縣荻港等處肅清

蕪湖首逆偽堵王黃文金等糾黨二萬突入荻港三
月初四日復分股竄陷繁昌之舊縣勢將下伺三山
峽初五日水師營官李朝斌等在營房背擊賊獲勝
遂率所部駛上舊縣會合營官萬化林等登陸襲賊

排礮環轟賊負創潰走初六日亦多斬獲逆不敢踞
卡專事野掠潛約荻港一股勾結繁昌蕪湖魯港之
賊別圖窺竄時同知曾貞幹陸師進駐三山峽距舊
縣三十里密諭各營堅壁以待十三十四等日賊果
分道來犯曾貞幹卽率各營及螃蟹磯水師循江岸
而進一敗賊於洋夾河再敗賊於三華山賊始悉衆
遠遁荻港等處一律肅清

河南南陽府戒嚴

楚軍攻安徽廬州甚急僞英王陳玉成密令僞扶王

陳得才率黨三萬餘人勾合捻匪孫光危陳大溍兩股約二萬餘人由河陽唐縣直逼河南南陽府城以圖分我兵力河南鄭巡撫元善駐師許州派兵勇馳援湖北官大臣等亦派總兵何紹彩領新訓八營由宜昌移營赴隨棗襄樊探蹤會勦並咨陝西瑛巡撫黎迅撥重兵以防商雒

賊撲江南三山峽官軍併力擊退乘勝克復繁昌縣僞匡王賴文鴻竄入繁昌縣糾約彼處踞匪撲我三山峽官營同知曾貞幹升高瞭望見旌旂掩映山谷

間往來如織乘逆未逼營督率各軍分道馳勦賊隊
更番迎撲我軍槍礮齊施乘風縱火羣賊大亂殪其
魁吳大觜敗匪退踞繁昌城內不敢復出曾貞幹以
有隙可乘定計潛帥襲之三月二十日夜掩旂息鼓
進薄城下束薪爲炬列礮環攻賊衆奔潰薄城將士
從西北關處猱升而上衆軍一齊擁入遂於二十一
日克復繁昌縣城

水陸各軍克復巢縣含山縣和州三城攻奪銅城牯雍
家鎮裕溪口西梁山四要隘

江蘇布政使曾國荃回湘募勇於二月中抵皖與水
營總兵李成謀成發翔等熟商賊之糧道在巢湖欲
制賊命必先從巢縣進兵欲攻巢縣必先從銅城牐
下手三月十五日曾布政親率十二營由林頭過河
以遏巢縣東北一路候補道劉連捷等督飭各營赴
望城岡以扼巢縣正南一路逆分股來撲均爲我軍
奮力擊退曾布政卽派隊會水師攻銅城牐十八日
會於渡口以水師攻牐東石壘以陸師攻牐西土壘
總兵成發翔等帶隊登岸抽刃環刺逆黨棄壘竄散

石壘旣破土壘亦平立將銅城牯攻奪復乘勝攻取
雍家鎮時曾布政親率陸師渡河已在巢縣旂山等
處紮營副將王東華鄧永林等水師亦先後進駛併
力奮攻二十日收復巢縣是日分三路窮追直抵含
山城外逆衆聞風喪膽相率狂奔各軍遂克含山縣
城二十二日進襲和州乘賊譁亂之後追至江口之
鍼魚嘴合軍痛勦江流爲赤二十三日攻克裕溪口
賊之據金陵也以全力扼東西梁山東爲古之博望
西爲天門俗以東西梁山呼之兩山對峙大江至此

一束水急流洄較小孤山尤爲形險曾布政以此弱金陵鎖鑰統全勝之師循江復上逼西梁山賊壘而陳二十四日賊向江州一路衝走水陸各軍爭起搏擊逆衆潰亂引頸受誅遂克西梁山自是金陵重關我軍已得其半

鮑軍連破賊壘克復石埭太平涇三縣

浙江提督鮑超在青陽息兵三日策逆黨立腳未定利在速攻應先取石埭太平以固徽州之防繼取涇縣以達甯國之路二十日徧諭諸將裹飯傳餐捲旂

疾走次軍龍口二十一日由龍口直抵石埭縣城城
壘各賊閉關死守我軍分五路環攻填濠而進將附
城十四壘一律削平城上矢石交下猝不可近總兵
婁雲慶等率領將士直薄城根從西北二門斬關而
入立復城池石埭旣克賊愈惶懼糾合援賊數萬人
圍集甘棠鎮以阻我師二十二日各營分三路進擊
復分兵由山後整隊衝出賊不能軍盡棄甘棠十七
壘而遁我軍悉力追逐進撲太平縣西門奪賊高山
四壘俯瞰城中賊遂驚潰棄城逃遁縣城亦收復二

十八日我軍馳至灣灘分路夾擊破其卡壘尾追至涇縣城下毀其西門水卡及東南土壘一擁入城又將涇縣克復

曾軍會克魯港要隘進復南陵縣

繁昌既拔蕪湖賊援潛在魯港屯踞以圖抗拒同知曾貞幹會同水師總兵李成謀分撥水陸各營合力併擊二十七日曾貞幹等引軍分攻南北兩岸李成謀督率各營在江面專擊水路之賊奪其船百餘隻撲水死者甚衆陸師見水賊已挫急攻石壘石卡水

師登岸助勦賊卽潰退立將三壘十餘卡埽盡曾港
餘匪悉向蕪湖竄走二十九日曾貞幹飛調分守曾
港各軍於四更時各挾火具馳抵南陵城下薄城而
營萬炬齊燃賊衆倉皇無措曾貞幹揮令施放火礮
轟坍城牆數丈各勇攀躋而入遂復南陵縣

浙軍回援衢州江山兩城圍解

僞侍王李侍賢率巨股圍撲衢州府城總兵李定泰
嬰城固守左巡撫宗棠肅清開化後馳抵常山攻克
招賢關逆衆棄狂城竄追殺二百數十名衢城糧路

遂通其撲犯江山之賊屯踞大溪灘毛邨一帶已革
臬司李元度親率十營進勦毛邨獲勝左巡撫復飭
知府劉典率所部會合進攻石門花園港賊巢毀壘
十四座殺賊數百名賊勢不支乘夜向台州潛遁
四月徽州防軍收復旌德縣

鮑軍克復青石太涇四縣旌德與甯國府賊勢中斷
駐徽之福建臬司張運蘭恐踞旌德之賊鋌走徽境
遂於三月三十日率所部進勦親督戰士懸軍深入
排礮仰攻轟坍城垣十餘處總兵張運桂冒火攀援

而上將士受傷甚多張運蘭恐有挫失暫令收軍四月初二日方圖決戰賊已宵遁遂復旌德縣

揚州軍續獲勝仗全境肅清

賊退儀徵後仍分踞各路時出擄糧四月十一日總兵詹啓綸帶隊出勦於儀徵北門十二里岔等處斃賊數百名獲騾馬二十餘匹大小洋槍百餘桿其竄擾沙漫洲等處逆匪亦經江南水師浙江黃巖鎮總兵黃彬等分路截勦過儀徵三十餘里逆黨計窮遠竄揚境肅清

曾營水陸各軍克復太平府蕪湖縣攻奪金柱關東梁山各要隘

逆匪竄踞金陵固以東西梁山爲鎖鑰亦以蕪湖爲屏障而尤以金柱關爲關鍵兵部右侍郎彭玉麟與江蘇布政使曾國荃定計水陸并攻將上游水師悉調赴裕溪口曾布政馬步十五營近逼金柱關下彭侍郎派總兵李朝斌等從上下游攻擊曾布政復潛率各哨疾抵太平府北門揮軍突進逆衆不及閉關相率狂奔我兵擁進北關遂於四月二十日將府城

克復彭侍郎親率各軍瞭見曾布政已繞出三汭河遂分水師爲三隊以二隊分扼江汭要隘以一隊攻金柱關礮箭環擊逆衆於烈焰中衝突而出我軍躍上隄埂短兵擊刺積骸滿渠卽時攻克金柱關將三汭河上駟渡數十壘平毀奪獲大礮三百七十餘尊旂械萬餘件其時分撥總兵黃翼升等軍往襲東梁山亦已一戰而下移軍進次蕪湖先是同知曾貞幹有招降蕪湖之約至是金柱關等相繼攻拔正司乘其自疑而圖之二十二日曾貞幹率各營循江而進

適與黃翼升等水師會合萬礮同轟羣賊內亂立將
蕪湖克復提督王明山等復攻破烈山石壘二座上
下各城要隘悉爲我有矣

皖楚軍會克廬州府勝大臣購擒首逆陳玉成

僞英王四眼狗陳玉成與僞忠王李秀成皆賊中驍
健洪逆倚爲左右手李秀成竄擾蘇常陳玉成則盤
踞皖楚交界之處自我軍攻克安慶陳玉成率黨由
石牌而上調宿松黃梅之賊同至野雞河欲赴湖北
德安襄陽一帶招集醜類以各賊首不從乘夜由六

安竄廬州衆志漸紛洪逆督責復切遂欲效死於廬
久踞不退楚軍荊州將軍多隆阿節節攻打四面合
圍至是月初十日密約皖軍總兵張得勝帶隊至北
門設伏誘戰逆果出城迎敵鏖戰逾時我軍佯退引
賊追過小岡見我軍旌旂密布驚潰回奔多將軍揮
兵掩殺斃賊甚多賊不敢復出張得勝等紮營緊逼
城垣逆已路窮率悍賊分出東北兩門攻撲皖軍挑
選精銳出營力戰楚軍已於東門獲勝馳至北門從
賊後包抄斷其歸路賊遂大潰兩軍合力衝殺乘勢

搶越城濠逆衆回城無路遂向西北奔竄轟斃殺斃
及落水死者不計其數副都統克蒙額等各帶兵勇
會合夾擊多將軍等分隊進城搜殺餘匪淨盡卽於
十五日克復府城統計殺賊九千餘名生擒老賊八
百四十七名內有僞官二百十三名訊明正法多將
軍派隊追勦陳玉成率餘黨三四千人於十七日竄
至壽州城外中津渡先經勝大臣密飭已革川北道
苗沛霖與已革副將苗景開設計開城誘之玉成帶
悍賊二三千人入城苗景開卽將吊橋撤去會同署

游擊朱佩棻齊集兵練將王成縛獲並擒僞導王陳仕榮僞從王陳德僞統天義陳聚成僞天軍主將向士才僞虔天義陳安成僞禱天義梁顯新及親隨僞官二十餘人擒逆張落刑聞知糾合大股捻逆七八萬人於二十六日突至江口集北岸屯紮意欲半途劫奪各營與苗練併力攻勦立將前隊悍賊擊潰捻逆紛紛逃竄追殺二十餘里將賊壘百餘座悉數埽除殺賊二三千名餘衆奔潰解陳玉成等至勝大臣營訊供奉

諭旨卽將陳玉成在軍前凌遲處死傳首皖楚以伸

國法而快人心陳仕榮一併正法苗沛霖前此作亂壽州
獲譴極重至是免其治罪後仍謀叛於同治二年冬
伏誅

陝西各軍殺賊於尹家衛等處

粵逆僞扶王等得才等勾結捻匪由河南竄入陝西
武關復由孝義廳竄出山口至尹家衛直逼省城游
擊孟柏林帶兵堵戰陝西瑛巡撫檄添派參將阿揚
阿帶兵會同紳團進勦四月初九日賊分兩路蟻擁

而至阿揚阿列隊抵禦斃賊數百人阿揚阿身受重傷猶復奮勇殺賊官兵無一退卻提督孔廣順調兵應援賊不敢進另股從韋曲入犯亦爲兵勇民團截勦斬獲長髮老賊首級九顆殺賊六十餘名向藍田宵遁其圍雒南之賊經署知縣張國均力戰解圍此外零股復經地方文武帶領兵勇民團追勦殆盡商雒已無賊蹤

上海軍克復青浦縣

四月初三日參將李恒嵩等率松滬官軍與副將銜

華爾之常勝軍攻克嘉定縣進規青浦十四日英法將士環攻南西二門華爾攻東門李恒嵩等督飭各隊並青浦縣知縣廖秩瑋帶團會攻北門其小西門水道亦經已革提督曾秉忠派游擊曾毓行等統帶礮船堵截賊匪負固抗拒西兵施放炸彈火器並以礮轟塌西南城牆十餘丈卽由西門登城華爾督勇繼進羣賊惶亂我軍一擁而上殺賊甚多餘匪奪門衝出痛加截殺進退無路投水死者不計其數陣斬悍賊千餘名生擒三千餘名當將青浦縣城克復

英國提督何伯法國提督卜羅德奉

詔嘉獎華爾授副將

皖軍追勦援賊江北肅清

揚防肅清後賊尙齎聚江邊各邨莊李提督世忠親督馬隊奮勇直入兵勇均奮不顧身短兵相接賊勢不支適副將李顯發等各隊馳至逆膽已喪李提督立投誠免死其被脅之衆棄械乞命者三千餘名賊衆驚惶南遁我軍併力追殺殲斃二千餘名生擒九百餘名竝先期設伏江浦東岸擒斬無算賊衆爭船

搶渡撲河落水者極衆江北一律肅清

楚軍追勦竄逆直抵壽州大獲勝仗

陳玉成竄出廬州時率黨三四千人已盡殲於壽州
矣其大股餘逆由吳山廟瓦埠余家埠基橋逃竄多
將軍派溫德勒克西等帶隊窮追疊次抄攔截殺計
斃賊一萬七八千名內有黃衣賊目五十餘名生擒
一千三四百名訊明正法廬城悍賊至此殲除殆盡
賊擾陝西渭南等處與川匪藍大順藍二順相通

粵逆僞扶王陳得才僞端王藍成春僞增王賴文光

偽啓王梁成富僞主將馬融和等均爲僞英王陳玉
成羽翼前由河南邊界竄逼陝西省城官軍擊敗東
竄渭南經知縣曹士鶴登陴守禦因賊衆兵單縣城
於四月二十四日失守曹士鶴手刃數賊力竭捐軀
其妻萬氏罵賊殉難縣丞銜陳茂軍功張龍驤於黃
家屯戰歿陳得才等因陳玉成在廬州被圍甚急南
向往援由陝境竄河南南陽一帶其時有川匪藍大
順藍二順李短搭搭等先於咸豐九年在雲南昭通
府倡亂蹂躪全川戕官據城經川省痛勦李短搭搭

就擒藍大順與藍二順弟兄分股竄入陝西藍大順
一股踞洋縣竝陷佛平廳藍二順一股踞商州山陽
縣至是與粵逆陳得才等相通互爲援應

上海軍攻克南匯奉賢交界處之南橋鎮賊壘隨收復
柘林奉賢二城法國提督於南橋陣亡

四月初十日李道奉

自署理江蘇巡撫接統諸軍四月十五日受事卽令參將
程學啓滕嗣武都司銜今直隸提督劉銘傳同知潘
鼎新通判韓正國以四千人進南匯縣周浦鎮爲北

路英法兵自松江進金山衛爲南路兩軍相距百數
十里以嘉定青浦新復飭常勝軍守之十九日會攻
南橋鎮逆恃三道土城更番施放槍礮子密如雨法
國提督卜羅德勇往直前撲近城濠揮軍冒烟衝入
賊衆驚潰當克南橋鎮賊壘二十日進攻柘林賊方
負固英兵及常勝軍營西南金山賊來援擊走之二
十二日遂克柘林二十三日奉賢縣知縣陳化鯤率
民團收復奉賢縣程學啓等屯周浦亦於二十二日
疊毀杭頭新場賊壘追賊至南匯卜羅德於南橋督

戰時中槍陣亡李巡撫馳奏

上以遠涉重洋協同中國兵將勦賊臨陣捐軀無忝使命
勇烈可嘉令李巡撫派員

賜祭並賞庫貂彩絨給其家

知府李慶琛覆軍太倉致嘉定縣城失守

時西兵方議直趨金山衛知府李慶琛以五千人攻
太倉蘇賊李秀成自率衆來援李巡撫檄慶琛相機
撤圍城之兵慶琛未卽應命四月十九日賊大至全
軍皆陷慶琛及同知周士濂死之嘉定青浦寶山同

時大震李巡撫檄英法二國全軍回援而移周浦之軍屯南橋以扼浦東要隘二十日賊至寶山參將姜德劉錫溫悉力固守二十八日賊別隊由婁塘攻陷嘉定縣城英法二提督護其兵及我軍突圍走上海李巡撫令副將熊兆周知縣李克勤駐法鎮扼滬西賊遂踰青浦徑逼松江

陝西賊攻撲潼關官軍勦擊獲勝立解城圍並收復山陽縣

逆匪由陝西之華陰縣竄至潼關經漢中鎮哈連升

潼商道蔣徵陶督率兵勇固守逆衆直撲西門勢甚猖獗官軍開礮轟擊斃賊多名其竄撲東門外之賊亦轟斃四五百名逆衆環攻三晝夜遂往東移動官軍追殺一千餘名生擒百餘名逆衆由小路竄向河南閿鄉一帶城圍立解其山陽踞匪因潼關之賊敗竄勢卽窮蹙副將張維義等督率兵團勦逐之當將山陳縣城收復

浙軍克復台州等一府六縣

逆匪竄踞台州並溫處各屬慶總督端札飭紳團會

同官弁分路攻勦署仙居縣知縣費希濂督帶民團
圍攻田市賊卡殺賊四百餘名進攻仙居縣城復斃
賊數百名賊退入城四月初三日民團設伏誘賊出
城殺賊數千並擒獲逆首延天義李元徠梟示當將
仙居縣城克復卽補道蘇鏡蓉等於初九日分帶兵
團攻復台州郡城殺賊甚衆並擒斬逆首僞王李洪
藻李遇茂二名各兵團直搗黃巖分路截殺陣斬僞
主將李尙揚僞佐將鄧積士初十日克復黃巖縣其
太平甯海二縣亦經地方官獎率義民攻殺克復至

分踞縉雲樂清二縣逆匪屢經夾擊已革縉雲縣知縣周士英督民團於四月二十日復縉雲縣總兵秦如虎等派撥師船於四月二十九日復樂清縣餘匪竄遁計二十六日之間克復台州一郡仙居黃巖太平甯海縉雲樂清等六縣藉民團之力爲多士氣爲之一振

浙軍克復甯波府鎮海縣青田縣

浙江前甯紹台道張景渠招集廣艇借助英國兵疊克甯波府鎮海縣城英國提督何伯請江蘇李巡撫

分常勝軍前往助守時有大股賊竄踞青田縣慶總督與總兵秦如虎各派兵練及長龍礮船往勦環攻三晝夜四月十二日黎明青田縣知縣吳兆祥等率勇由東門架梯直上手刃執旗賊目二名兵勇一擁而登逆衆不能抵禦由西門竄去立將縣城克復

五月上海軍招撫賊目收復南匯縣並克復川沙廳

僞什天安吳建瀛等統衆踞南匯與僞淋天福劉玉林屢爲李秀成養子所淩自官軍踞毀杭頭新場賊壘後吳建瀛等屢次乞降五月初一日都司銜劉銘

傳等分帶勇團直抵城下城內降衆全行薙髮並將
偽印兵器呈繳官軍整隊入城秀成養子方踞金山
衛聞吳建瀛投降令偽將吉慶元率賊萬餘犯南匯
射手書僞示入城吳建瀛隨同署知縣鄧賢芬帶勇
擊却之初四日復合川沙賊來犯劉銘傳吳建瀛登
城固守並派隊出城夾擊賊衆敗潰官軍直逼川沙
賊隊由海塘竄出沿途截殺甚衆遂於初五日收復
川沙廳城進規松江

浙江湖州陷在籍總辦團防布政使銜福建糧儲道趙

景賢被執不屈

景賢前刑部趙侍郎炳言第三子由舉人議叙知府
幼有奇氣以千古自命善撫循士卒人樂爲用自咸
豐二年總司湖州團防每戰必捷洊升道員加布政
使銜

簡授福建糧儲道屬杭州再陷逆衆於十一年十二月以
全力困之戰守數月糧援並絕五月初三日千總熊
得勝開門延賊城遂陷景賢冠帶罵賊不屈被執至
蘇州拘繫之後至二年三月我兵克復太倉潰賊回

蘇播言景賢通官兵將襲蘇逆首僞慕王譚紹洸詰之曰汝通官兵耶曰我本官兵何得謂通曰汝獻蘇州耶曰蘇州本

大清土地何得謂獻曰汝今死期至矣景賢大笑曰求之一年而不得者遂肆謾罵逆舉洋槍一發中胸而殞事聞奉

旨照巡撫例賜卹予謚立傳

曾營水陸並進疊復秣陵關江心洲等六要隘圍逼江南府駐軍雨花臺

江蘇布政使曾國荃於四月二十八日率所部各營乘勝前進破周邨一卡遂駐江甯鎮之板橋熟察形勢必從大勝關三汊河下手陸師乃有運糧之路水師乃有立營之所然橫距三十里外尙有秣陵一關環水嶺峙亦天然雄鎮也賊備未嚴可以襲取五月朔曾布政引軍馳抵關下守關賊酋汪伍等舉衆獻關初二日奪取大勝關三汊河二壘平之彭侍郎曾布政懸軍深入懸約提督王明山率水師策應初三日拔頭關過此以往則爲江心洲堅大石壘倚洲

雙鋒彭侍郎會同王明山親督將弁直驅舟次各勇
挾火具登岸延燒蘆草一片火光我軍振臂齊呼躍
入賊牆燒薙羣醜竝奪取蒲包洲遂泊金陵之護城
河口曾布政由陸路倚護水師驅軍逼紮雨花臺距
金陵南門五里許

鮑軍進攻甯國府勦平寒亭等處逆壘

僞輔王楊輔清糾衆十餘萬竄踞甯國府城復分股
屯聚團山寒亭等處阻我進兵之路浙江提督鮑超
飭將士進薄寒亭逆衆出巢猛鬪羣賊響應數逾四

萬鮑提督直擣中堅縱橫盪決總兵宋國永等橫躍
入陣衝賊數段山後伏兵齊起扼賊歸路賊始驚潰
追殺二十餘里將寒亭管家橋梅家甸獅子山賊館
數十處賊壘三十五座一律蹋平殺賊六千餘人僞
衛王楊雄清糾合零匪遁回甯郡

河南軍勦賊於渾池等處

逆匪由陝西潼關小路竄撲河南閿鄉縣因城垣圯
塌被賊闌入知縣王其昌巷戰被戕陝州知州王詒
督兵馳援立即克復逆匪回竄由新安渾池一帶向

宜陽大路疊撲嵩縣伊陽葉縣均經地方文武及帶
兵將領堵勦並於澠池縣之滑甸宜陽縣之大辛甸
汝州之古堆郊縣之長阜等處疊有斬擒逆蹤漸戢
仍游弋於邊界

上海軍連獲大捷松江解圍滬防解嚴

逆匪圍逼松江府城李巡撫以松江扼浦東西之中
爲尤要地不可失自赴新橋令參將程學啓等時出
兵綴賊屬華爾撤歸甯波防軍與知府賈益謙及李
恒嵩等嚴令固守伺隙出擊賊初營西門妙嚴寺土

山逼城近華爾以礮毀之並奪其大張涇營以通上海初八日賊復攫據之增築礮台環攻四門我軍乃盡括城中大礮數十洋槍千餘環列城堞擊賊兩晝夜不絕賊頗創初十日常勝軍三百人自甯波歸與賊戰於寶福浜毀其礮臺城內各軍乘夜分門出擊殺斃無算賊向西北分股竄遁次日華爾思往青浦而賊騎仍逼城且青浦圍裹數重不可守乃議棄青浦十三日夜分簡常勝軍之銳猝破天馬山賊營由礮路突入青浦城盡焚米糧輜重軍船率隊伍死戰

出併力守松江其分紮廣富林及泗涇大股賊匪經
李巡撫督兵往勦十一日前隊近逼泗涇斃賊多名
生擒十餘名立將賊卡攻毀餘賊遁入營斷橋以拒
李巡撫令參將張遇春等復誘賊出巢轟斃賊數百
名二十一日逆首僞聽王陳炳文等糾集悍賊五六
萬直撲官軍新橋營盤蔓及徐家匯九里橋包過營
後直逼滬城勢極兇猛其圍攻開字營賊匪填濠拔
椿洋槍大礮併力死撲參將程學啓督兵抵禦槍礮
磚石同時並施賊匪尸與濠平隨斃隨上勢將蹙登

程學啓手燃巨礮乘勢開門衝殺賊衆卻而復進自辰至申凡八九次另股分圍林字等官軍各營亦經通判韓正國等督兵殺斃悍賊數百名賊匪更番疊上四五次不退李巡撫督隊分三路進援參將張遇春等遇賊於徐家匯之九里橋分路併攻張遇春馬傷落地復奮砍賊目奪馬躍上都司張志邦斬取賊目首級擲入賊陣逆衆萬餘聞然駭退官軍追至營邊逆匪數萬復合抵死鏖戰各營官兵齊開壘門內外夾擊賊盡棄械狂奔自相踐蹋而死共計殺賊三

千餘名落水淹斃及解散脅從各數千名生擒四百
餘名奪獲槍礮馬匹旂幟數千件槍傷偽聽王陳炳
文其偽納王邵永寬亦負傷竄遁二十三日官軍復
乘勝進攻泗涇逆衆喘息未定不戰自走當將賊壘
數十座全行蹋毀並焚燒賊棚三千餘座其附近廣
富林等處踞賊亦聞風全數逃走松江圍解滬防亦
解嚴

四川逆匪竄入貴州正安等州縣境內兵勇擊卻之由
黔西邊界仍竄川境

粵逆僞翼王石達開竄擾四川分股入貴州正安等
州縣境內經貴州韓巡撫督飭兵練擊敗後備聚鵬
溪總兵吳安康與候選知縣羅燦奎帶練會勦四月
二十八日夜挑選練勇暗入鴨溪施放火箭火彈逆
衆驚亂紛紛潰遁我軍追殺數十里餘匪從黔西州
邊界仍竄入川韓巡撫等督飭文武跟蹤追勦並會
合四川官軍兜擊之

川軍攻勦石逆立解綦江縣城圍進攻長甯縣

石逆竄涪州爲官軍擊敗尙擁衆數萬圍攻綦江縣

城知縣楊銘率衆固守知府唐炯率黔勇由石佛岡
攻進焚燒賊巢城中練勇殺出前後夾攻賊衆披靡
城圍立解道員曾傳理先駐合江扼賊上竄梟司劉
嶽昭總兵唐友耕會同唐炯率隊緊追沿途截殺逆
又圍攻永甯復經兵勇擊敗向興文奔竄其另股賊
匪張逆圍攻江安因官軍由藍田壩急進聞風解圍
先遁遂勾結石逆攻陷長甯縣劉嶽昭等派隊追擊
賊遂分竄珙縣及高縣之巡檢寺等處復經曾傳理
馳勦將賊壘焚燬賊遁回長甯各路兵勇會攻之

陝西山陽縣踞賊藍二順通粵匪竄陷湖北鄖西縣官軍克復之

藍二順踞商州之山陽縣於四月內與粵匪陳得才等通五月初九日竄陷湖北鄖西縣官大臣會湖北嚴巡撫樹森先飭調赴隨棗之總兵何紹彩率新訓四營往勦復派安襄鄖荆道金國琛等帶軍馳往逆衆聞風喪膽分股由馬安次溝香口等處潛竄官軍整隊馳擊於二十六日將縣城克復

六月鮑軍克復甯國府旋收甯國縣城降其酋洪客海

偽輔王楊輔清竄踞甯國間寒亭戰敗卽糾約逆黨
繞城結壘延亘三十餘里力拒官軍五月初十日浙
江提督鮑超引兵進紮烏沙鋪相度形勢十五日先
令總兵婁雲慶等設伏於望城岡仍令總兵宋國永
等誘賊賊果輕我兵寡直壓山岡而下鮑超復令總
兵黃慶等張兩翼抄來賊已卻走瞥見旂幟掩映山
谷間以爲賊衆來援回鞭轉鬪伏軍突起騰蹕而前
衝賊數段參將韋志俊等截斷賊後宋國永揮軍進
擊遇者輒殪逸出之賊又爲副都統明興騎隊追及

斃賊約八千人遂破望城岡竝將抱龍岡一帶十數
邨逆壘悉平逆首復陰結另股列隊城根築壘堅拒
六月初八日鮑超率各軍逼壘下寨逆黨日出巢迎
敵屢爲我敗十四日各僞王出大隊於南北兩門以
冀夾攻鮑超督飭將弁向各門分進搏戰逾時賊旂
漸亂潰奔浮橋我軍焚橋截殺幾無脫者南路之賊
旣敗北路遂遁適西路之捷亦至削平附城賊壘會
集於小東門外十五日楊逆復收合餘燼以圖再戰
鮑超率各軍驟進勢如風雨逆已敗至洪林橋忽聞

陣返撲鮑超令作圓陣圍之環加勦洗楊逆單騎脫
去城賊見首逆不返議降議守紛紜未定我軍已自
洪林橋直入東門斬雍無遺立將府城克復鮑超追
勦敗匪隨收復甯國縣城有僞保王洪客海驍勇善
戰本爲石達開死黨咸豐十一年轉隸僞忠王李秀
成隊下賊黨援甯郡洪客海在其中屯衆數萬於孫
家埠未開一仗卽遣人乞降稱與羣賊有隙願取郡
城縛輔逆以獻鮑超與之期約許以自新適郡城克
復洪客海徑走廣德於二十日襲取州城又申言率

衆六萬就撫曾大臣察其誠乃許來歸酌留三千人
編爲六營餘部一律遣散

金陵陸師屢卻撲營悍賊

江蘇布政使曾國荃督軍在雨花臺秣陵關等處屢
次擊賊獲勝六月初六初十等日僞王宗李逆糾集
悍黨自蘇州來援火器對轟互有損傷十六日城中
出賊四五萬人分撲各營我軍憑濠穩擊斃賊極多
候補道劉連捷等見黃衣騎馬賊指揮督陣猛鷲無
匹潛燃巨礮一發而殪卽乘羣賊靡亂之際併力掩

擊立解重圍各將弁亦拔卡而出馳斬賊酋與劉連捷所派之隊合軍追勦殲賊近二千人二十四日甯國餘匪復勾合城賊襲營知州易良虎等令各勇穴牆施礮伺賊稍懈出擊之逆衆返奔不及半就誅戮東路之賊亦經劉連捷引軍擊走俘馘無算

陝西粵逆陳得才等竄河南

陳得才等自渭南竄出欲至安徽廬州援狗逆陳玉成經西安將軍托明阿等督飭兵團沿途截勦斃匪數百餘名逆衆竄至河南聞陳玉成已爲我軍擒戮

因在浙川內鄉一帶掠鄉攻城均爲各地方官擊敗
復乘雨圍攻新野縣城竄入唐縣境內唐縣知縣高
天寵督勇截勦殲賊三百餘名生擒十餘名河南鄭
巡撫元善飭調各路官軍馳往兜勦

上海軍攻克奉賢縣進克金山衛城

初奉賢縣既克未設守仍爲賊踞五月十一日知府
潘鼎新都司劉銘傳令降酋吳建瀛劉玉林攻復之
玉林率所部由柘林進攻漕涇鎮賊營又破之時賊
踞金山衛城地界江浙爲浦東門戶李巡撫議規取

金山檄鼎新等屯軍漕涇由海塘進東北檄華爾由
張堰進西南會攻之十四日官軍至南沙十七日軍
功潘鼎琛把總徐道奎攻毀海塘賊壘直薄城下逆
衆於南門突出二千名搏戰銘傳燃洋槍斃其魁賊
始却十八日參將覃聯陞帶隊馳至而華爾及李恒
嵩軍亦至進紮城根屢敗逆衆遂於二十一日將衛
城克復浦東一律肅清李巡撫令鼎新銘傳聯陞三
軍分駐要隘扼守之

江南提督黃翼升統水師至上海

翼升奉

旨統水師東征於五月間下駛以二營駐浦口四營分駐揚州下之三江營六月初八日自統四營至上海會大臣奏請以翼升署江南提督